

藏經書院版

卍
續藏經

第 14 冊

中國撰述

大小乘釋經部

新文豐出版公司
印行

南無本師釋迦牟尼佛



新文豐出版公司影印卍續藏經會編印

卍續藏經

第十四冊 中國撰述 大小乘釋經部

華嚴綱要八十卷之內自六十八至八十卷	唐澄觀疏義	0001
圓覺經大疏十二卷	明德清提挈	0215
圓覺經大疏釋義鈔二十六卷之內自一之上至十一之下	唐宗密撰	0407

大方廣佛華嚴經綱要卷第六十八

于闐國三藏沙門實叉難陀 譯經

清涼山大華嚴寺沙門澄觀 疏義

明匡山法雲寺慈山沙門德清提挈

入法界品第三十九之九

爾時善財童子大智光明照啓其心思惟觀察見諸法性得了知一切言音陀羅尼門得受持一切法輪陀羅尼門得與一切衆生作所歸依大悲力得觀察一切法義理光明門得充滿法界清淨願得普照十方一切法智光明得徧莊嚴一切世界自在力得普發起一切菩薩業圓滿願漸次遊行至險難國寶莊嚴城處處尋覓婆須蜜多女城中有人不知此女功德智慧作如是念今此童子諸根寂靜智慧明了不迷不亂諦視一尋無有疲懈無所取著目視不瞬心無所動甚深寬廣猶如大海不應於此婆須蜜女有貪愛心有顛倒心生於淨想生於欲想不應爲此女色所攝此童子者不行魔行不入魔境不沒欲泥不被魔縛不應作處已能不作有何等意而求此女其

中有人先知此女有智慧者告善財言善哉善哉善男子汝今乃能推求尋覓婆須蜜女汝已獲得廣大善利善男子汝應決定求佛果位決定欲爲一切衆生作所依怙決定欲拔一切衆生貪愛毒箭決定欲破一切衆生於女色中所有淨想善男子婆須蜜女於此城內市廛之北自宅中住時善財童子聞是語已歡喜踊躍往詣其門見其住宅廣博嚴麗寶牆寶樹及以寶璽一一皆有十重圍繞其寶璽中香水盈滿金沙布地諸天寶華優鉢羅華波頭摩華拘物頭華芬陀利華徧覆水上宮殿樓閣處處分布門闔窗牖相望間列咸施網繹悉置幡幢無量珍奇以爲嚴飾瑠璃爲地衆寶間錯燒諸沈水塗以栴檀懸衆寶鈴風動成音散諸天華徧布其地種種嚴麗不可稱說諸珍寶藏其數百千十大園林以爲莊嚴爾時善財見此女人顏貌端嚴色相圓滿皮膚金色目髮紺青不長不短不麤不細欲界人天無能與比音聲美妙超諸梵世一切衆生差別言音悉皆具足無不解了深達字義善巧談說得如幻智入方便門衆寶璣

珞及諸嚴具莊嚴其身。如意摩尼以爲寶冠而冠其首。復有無量眷屬圍繞。皆共善根同一行願。福德大藏具足。無盡時婆須蜜多女。從其身出。廣大光明。普照宅中一切宮殿。遇斯光者。身得清涼。爾時善財前詣其所。頂禮其足。合掌而住。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能教誨。願爲我說。彼卽告言。善男子。我得菩薩解脫名離貪欲。際隨其欲樂而爲現身。若天見我。我爲天女。形貌光明殊勝無比。如是乃至人非人等。而見我者。我卽爲現人非人女。隨其樂欲。皆令得見。若有衆生欲意所纏。來詣我所。我爲說法。彼聞法已。則離貪欲。得菩薩無著境界。三昧若有衆生暫見於我。則離貪欲。得菩薩歡喜三昧。若有衆生暫與我語。則離貪欲。得菩薩無礙音聲三昧。若有衆生暫執我手。則離貪欲。得菩薩徧往一切佛刹三昧。若有衆生暫升我座。則離貪欲。得菩薩解脫光明三昧。若有衆生暫觀於我。則離貪欲。得菩薩寂靜莊嚴三昧。若有衆生見我。頻申則離貪欲。得菩

薩摧伏外道三昧。若有衆生見我。瞬則離貪欲。得菩薩佛境界光明三昧。若有衆生抱持於我。則離貪欲。得菩薩攝一切衆生。恒不捨離三昧。若有衆生。啖我屑吻。則離貪欲。得菩薩增長一切衆生福德藏三昧。凡有衆生親近於我。一切皆得住離貪際。入菩薩一切智地。現前無礙解脫。善財白言。聖者。種何善根。修何福業。而得成就如是自在。答言。善男子。我念過去有佛出世。名爲高行。其王都城名曰妙門。善男子。彼高行如來。哀愍衆生。入於王城。蹈彼門闢。其城一切悉皆震動。忽然廣博衆寶莊嚴。無量光明。遞相映徹。種種寶華散布其地。諸天音樂同時俱奏。一切諸天充滿虚空。善男子。我於彼時爲長者妻。名曰善慧。見佛神力心生覺悟。則與其夫往詣佛所。以一寶錢而爲供養。是時文殊師利童子爲佛侍者。爲我說法。令發阿耨多羅三藐三菩提心。善男子。我唯知此菩薩離貪際解脫。如諸菩薩摩訶薩。成就無邊巧方便。智其藏廣大境界無比。而我云何能知能說。彼功德行。善男子。於此南方有城名善度。中有居士名鞞瑟

毗羅彼常供養栴檀座佛塔。汝詣彼問菩薩云。何學菩薩。行修菩薩道時。善財童子頂禮其足。繞無數。而殷勤瞻仰。辭退而去。

第五善友婆須密女。寄無盡功德藏。迴向由迴向。力能成無量功德藏。故婆須密多。此云世友。亦云天友。隨世人天方便化。故國名險難者。逆行非道。下位不能行。故城名寶莊。嚴者逆順世行。能生無盡功德藏。故善財由聞一切智光。故思修趣入得二種益。見諸法性得前實智。又得了知一切下則得權智。由前窮三世差別智。故由得二智。故能示現逆行於生死中。一一逆行盡成功德藏矣。故以婆須密此位也。善財既得此益矣。漸次遊行。至險難國寶莊嚴城。覓婆須密言險難者。於逆行入欲是爲險難。轉逆爲順。故成寶莊嚴婆須密逆行意在於此。以逆行難測。非尋常可知。故善財初問人皆生疑。非智眼不知。故有人告言。獲廣大善利。言在城市。鄺北者在。欲行禪處。喧寂故。自宅中者。謂安住畢竟空。方能逆行。故善財依教往詣。先見依

報殊勝有七行。經言。究宅舍種種莊嚴者。畢竟空中無德不具。故次見正報端嚴有八行。經婆須身有光明。普照宅中者。以本有智光照畢竟空。故觸之者身得清涼。卽此以具離欲三昧矣。善財敬問法門。婆須答以得菩薩解脫名離貪欲。際此正授已。法界先示其名也。言離欲際者。以凡夫著欲二乘離欲。菩薩不斷貪欲而得解脫。以智了性空。欲卽道故。故處染不染。方爲究竟離欲。際卽眞實。故次別顯三昧業。用現種種身示種種行。有十五行。經具彰隨欲便宜。得甚深三昧。次善財自言。乃問得法因緣。意在依教而修。故婆須答以往昔以一寶錢供養高行。如來是時文殊師利童子爲佛侍者。爲我說法。令我發菩提心。此則從根本智而發。此行故佛爲高行。此是三昧之本。故然一錢甚微。能得此深三昧者。以寶爲至愛物。小而愛甚。由能捨甚愛。故得離貪。際解脫宜矣。次謙已云。我唯得此一法門耳。如諸菩薩成就無邊廣大境界。則非我所知。乃指後友云。南方有善度城。有居士名轉

瑟枳羅汝可往問當爲汝說善財作禮辭退而去
爾時善財童子漸次遊行至善度城詣居士宅頂禮
其足合掌而立白言聖者我已先發阿耨多羅三藐
三菩提心而未知菩薩云何學菩薩行云何修菩薩
道我聞聖者善能誘誨願爲我說居士告言善男子
我得菩薩解脫名不般涅槃際善男子我不生心言
如是如來已般涅槃如是如來現般涅槃如是如來
當般涅槃我知十方一切世界諸佛如來畢竟無有
般涅槃者唯除爲欲調伏衆生而示現耳善男子我
開栴檀座如來塔門時得三昧名佛種無盡善男子
我念念中入此三昧念念得知一切無量殊勝之事
善財白言此三昧者境界云何居士答言善男子我
入此三昧隨其次第見此世界一切諸佛所謂迦葉
佛拘那含牟尼佛拘留孫佛尸棄佛毗婆尸佛提舍
佛弗沙佛無上勝佛無上蓮華佛如是等而爲上首
於一念頃得見百佛得見千佛得見百千佛得見億
佛千億佛百千億佛阿庾多億佛那由他億佛乃至
不可說不可說世界微塵數佛如是一切次第皆見

亦見彼佛初始發心種諸善根獲勝神通成就大願
修行妙行具波羅蜜入菩薩地得清淨忍摧伏魔軍
成正等覺國土清淨衆會圍繞放大光明轉妙法輪
神通變現種種差別我悉能持我悉能憶悉能觀察
分別顯示未來彌勒佛等一切諸佛現在毗盧遮那
佛等一切諸佛悉亦如是如此世界十方世界所有
三世一切諸佛聲聞獨覺諸菩薩衆悉亦如是善男
子我唯得此菩薩所得不般涅槃際解脫如諸菩薩
摩訶薩以一念智普知三世一念徧入一切三昧如
來智入恒照其心於一切法無有分別了一切佛悉
皆平等如來及我一切衆生等無有二知一切法自
性清淨無有思慮無有動轉而能普入一切世間離
諸分別住佛法印悉能開悟法界衆生而我云何能
知能說彼功德行善男子於此南方有山名補怛洛
迦彼有菩薩名觀自在汝詣彼問菩薩云何學菩薩
行修菩薩道卽說頌曰

海上有山多聖賢
華果樹林皆徧滿

衆寶所成極清淨
泉流池沼悉具足

勇猛丈夫觀自在

爲利衆生住此山

汝詣往問諸功德

彼當示汝大方便

時善財童子頂禮其足。繞無量。而已。殷勤瞻仰。辭退而去。

第六善友。轉瑟胝羅。寄入一切平等善根。迴向善友名。轉瑟胝羅者。此云。纏裹。義當包攝。謂塔中。包攝一切佛故。或云。攝入。以此長者。供佛塔故。然塔表寂滅法身。以法身生。佛平等故。表攝諸善根入法身平等際。故城名善友者。無一善根不到究竟實際。故善財依教。趣求至善度城。詣居士宅。見敬諮問。居士告曰。我得菩薩解脫名。不般涅槃。際此正授法界之名也。言不般涅槃。般者入也。窮諸如來。不入涅槃之實際。故謂法身常住寂滅。永安一向涅槃。何容更入。故云。不入以旃檀香表法身。然香氣普熏。故生佛平等。故衆生凡有善根。皆法身所流。故爲平等。一一歸於實際。故云。迴向。故長者告善財言。我開塔門時。得三昧名。佛種無盡。意顯一切善根。皆依法身故。爲佛種。故念念中入此。

三昧。念念得知無量殊勝之事。以事事稱法界性。故云。殊勝。次善財問此三昧之境。界長者告以入三昧時。次第見一切佛。有十三行經。皆言三昧境界。以顯三昧之業用。故結云。聲聞獨覺菩薩。與一切三世佛等。與毗盧遮那等。此結示平等法界也。次謙已云。我唯得此不般涅槃。解脫一法門耳。如諸菩薩。一念普知三世等殊勝功德。非我所知。乃推勝指示後友云。於此南方有山名補怛洛伽。有菩薩名觀自在。汝可往問。當爲汝說。復偈以讚之。言海上有山者。大悲隨順入生死海。住涅槃山。故卽南印度之南海。時善財童子瞻仰辭退而去。大文第七觀自在菩薩寄等隨順一切衆生。迴向。謂以善根等心。隨順諸衆生。故然約觀音普門示現。隨衆生心感而應現。爲等隨。順義。言觀自在。亦云。觀世音。以梵云。婆盧枳底。此云。觀濕法。羅。此云。自在。又云。攝伐多。此云。音。以約菩薩修甚深般若。照見五蘊皆空。故云。自在。若約於觀音如來從聞思修得耳根圓通。故云。觀音。然以普門示現。卽是。

等隨順一切衆生迴向之義

爾時善財童子一心思惟彼居士教入彼菩薩解脫之藏得彼菩薩能隨念力憶彼諸佛出現次第念彼諸佛相續次第持彼諸佛名號次第觀彼諸佛所說妙法知彼諸佛具足莊嚴見彼諸佛成正等覺了彼諸佛不思議業漸次遊行至於彼山處處求覓此大菩薩見其西面巖谷之中泉流縈映樹林蓊鬱香草柔軟右旋布地觀自在菩薩於金剛寶石上結加趺坐無量菩薩皆坐寶石恭敬圍繞而爲宣說大慈悲法令其攝受一切衆生善財見已歡喜踊躍合掌諦觀目不暫瞬作如是念善知識者則是如來善知識者一切法雲善知識者諸功德藏善知識者難可值遇善知識者十力寶因善知識者無盡智炬善知識者福德根芽善知識者一切智門善知識者智海導師善知識者至一切智助道之具便即往詣大菩薩所爾時觀自在菩薩遙見善財告言善來汝發大乘意普攝衆生起正直心專求佛法大悲深重救護一切普賢妙行相續現前大願深心圓滿清淨勤求佛

法悉能領受積集善根恒無厭足願善知識不違其教從文殊師利功德智慧大海所生其心成熟得佛勢力已獲廣大三昧光明專意希求甚深妙法當見諸佛生大歡喜智慧清淨猶如虚空既自明了復爲他說安住如來智慧光明爾時善財童子頂禮觀自在菩薩足繞無數匝合掌而住白言聖者我已先發阿耨多羅三藐三菩提心而未知菩薩云何學菩薩行云何修菩薩道我聞聖者善能教誨願爲我說菩薩告言善哉善哉善男子汝已能發阿耨多羅三藐三菩提心善男子我已成就菩薩大悲行解脫門善男子我以此菩薩大悲行門平等教化一切衆生相續不斷善男子我住此大悲行門常在一諸如來所普現一切衆生之前或以布施攝取衆生或以愛語或以利行或以同事攝取衆生或現色身攝取衆生或現種種不思議色淨光明網攝取衆生或以音聲或以威儀或爲說法或現神變令其心悟而得成熟或爲化現同類之形與其共居而成熟之善男子我修行此大悲行門願常救護一切衆生願一切衆

生離險道怖。離熱惱怖。離迷惑怖。離繫縛怖。離殺害怖。離貧窮怖。離不活怖。離惡名怖。離於死怖。離大眾怖。離惡趣怖。離黑闇怖。離遷移怖。離愛別怖。離冤會怖。離逼迫身怖。離逼迫心怖。離憂悲怖。復作是願。願諸衆生。若念於我。若稱我名。若見我身。皆得免離一切怖畏。善男子。我以此方便。令諸衆生。離怖畏已。復教令發阿耨多羅三藐三菩提心。永不退轉。善男子。我唯得此菩薩大悲行門。如諸菩薩摩訶薩。已淨普賢一切願已。住普賢一切行。常行一切諸善法。常入一切諸三昧。常住一切無邊劫。常知一切三世法。常詣一切無邊刹。常息一切衆生惡。常長一切衆生善。常絕衆生生死流。而我云何能知。能說彼功德。行爾時東方有一菩薩。名曰正趣。從空中來。至娑婆世界輪圍山頂。以足按地。其娑婆世界六種震動。一切皆以衆寶莊嚴。正趣菩薩放身光明。映蔽一切日月星電。天龍八部。釋梵護世所有光明。皆如聚墨。其光普照一切地獄畜生。餓鬼閻羅王處。令諸惡趣衆苦皆滅。煩惱不起。憂悲悉離。又於一切諸佛國土。普雨一

切華香瓔珞衣服幢蓋。如是所有諸莊嚴具。供養於佛。復隨衆生心之所樂。普於一切諸宮殿中。而現其身。令其見者。皆悉歡喜。然後來詣觀自在所。時觀自在菩薩告善財言。善男子。汝見正趣菩薩來。此會不白言已見。告言善男子。汝可往問菩薩云。何學菩薩行修菩薩道。

文中先釋名。此下依教趣求。故善財思惟。彼教即入彼解脫。隨思證入。故漸次遊行。至彼山處。見其西面巖谷中。菩薩於金剛寶石上坐。無量菩薩圍繞。而爲宣說大慈悲法。善財見已。歡喜踊躍。諦觀作念。善知識益。即往詣大菩薩所。見敬諮問。爾時觀自在菩薩遙見善財。即以讚攝大悲深厚。隨順攝受。故有七行經皆讚攝之辭。善財頂禮敬問法要。菩薩先審發心。次授法界云。我已成就菩薩大悲行解脫門。以此行行平等教化一切衆生。相續不斷。次我住此大悲行門下。廣顯業用。先五行半經約普門以顯業用。以四攝等十一句已攝種種示現。然三十二應在此。或現色身及說法二句已

攝盡無遺。次有八行。經約大悲行。以顯業用。末後令進大心。永不退轉。次謙已云。我唯得此大悲行門而已。如諸菩薩普賢願等廣大行門。非我所知。爾時即見東方有一菩薩。名曰正趣。從空中來。至娑婆界。現大神變。時觀自在菩薩告善財言。汝見正趣菩薩來此會否。答言。已見。觀自在云。汝可往問。以在本會。故闕禮辭。

爾時善財童子敬承其教。遽即往詣彼菩薩所。頂禮其足。合掌而立。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能教誨。願爲我說。正趣菩薩言。善男子。我得菩薩解脫名。普門速疾行。善財言。聖者。於何佛所得此法門。所從來。剎去此幾何。發來久如。告言。善男子。此事難知。一切世間天人阿修羅沙門婆羅門等所不能了。唯勇猛精進。無退無怯。諸菩薩衆已爲一切善友所攝。諸佛所念。善根具足。志樂清淨。得菩薩根。有智慧眼。能聞能持。能解能說。善財言。聖者。我承佛神力。善知識力。能信能受。願爲我說。正趣菩

薩言。善男子。我從東方妙藏世界普勝生佛所而來。此土於彼佛所得此法門。從彼發來。已經不可說不可說。佛刹微塵數劫。一心中舉不可說不可說。佛刹微塵數步。一步一步過不可說不可說。世界微塵數佛刹。一一佛刹我皆徧入。至其佛所以妙供具而爲供養。此諸供具皆是無上心所成。無作法所印。諸如來所忍。諸菩薩所歎。善男子。我又普見彼世界中一切衆生。悉知其心。悉知其根。隨其欲解。現身說法。或放光明。或施財寶。種種方便。教化調伏。無有休息。如從東方南西北方四維上下亦復如是。善男子。我唯得此菩薩普疾行解脫。能疾周徧到一切處。如諸菩薩摩訶薩。普於十方無所不至。智慧境界等無差別。善布其身。悉徧法界。至一切道。入一切刹。知一切法。到一切世。平等演說一切法門。同時照耀。一切衆生於諸佛所不生分別。於一切處無有障礙。而我云何能知能說彼功德行。善男子。於此南方有城名墮羅鉢底。其中有神名曰大天。汝詣彼問菩薩云。何學菩薩行。修菩薩道。時善財童子頂禮其足。繞無數匝。殷

勸瞻仰辭退而去

第八正趣菩薩寄真如相迴向。謂善根卽如成迴向。故以一切法皆趣真如。故名正趣。善財陳已發心。乃問修菩薩道。正趣菩薩。告言。我得菩薩解脫名。普門速疾行。此正授法界先標名。體十方無際。故云普門。一念超多。故云速疾。以依真如行。則一念頓證菩提。故下顯法門業用。故善財問從何佛得此法。又問所從來。刹去此幾何。發來久如。正趣告言。此處難知。謂非大根不堪領受。善財自謂已力所堪。正趣告言。我從東方妙藏世界普勝生佛所得。此法門從彼發來。意顯自不動本智。如來藏界。普生萬善。本覺而來。此答得處。以一念頓超。故言從彼發來。經不可說劫。此答時之久。近多時多步。則知其遠不離一念。則雖遠而近。故爲速疾。所經一一佛刹。調伏衆生。一方如此。十方亦然。故爲普門。次謙已云。我唯得此菩薩普速疾行解脫而已。如諸菩薩普於十方無所不至。智慧境界等勝功德行。非我能知。乃指後友云。此南方有城名墮

羅鉢底。彼中有神名曰大天。汝可往問。當爲汝說時善財童子殷勤瞻仰辭退而去

爾時善財童子入菩薩廣大行求菩薩智慧境。見菩薩神通事。念菩薩勝功德。生菩薩大歡喜。起菩薩堅精。進入菩薩不思議自在解脫行。菩薩功德地。觀菩薩三昧。堪住菩薩總持地。入菩薩大願地。得菩薩辯才地。成菩薩諸力地。漸次遊行。至於彼城。推問大天。今在何所。人咸告言。在此城內現廣大身。爲衆說滿爾時善財至大天所。頂禮其足。於前合掌而作是言。聖者我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能教誨。願爲我說。爾時大天長舒四手。取四大海水。自洗其面。持諸金華。以散善財。而告之言。善男子。一切菩薩難可得見。難可得聞。希出世間於衆生中。最爲第一。是諸人中。芬陀利華爲衆生歸。爲衆生救。爲諸寶間作安隱處。爲諸世間作大光明。示迷惑者安隱正道。爲大導師。引諸衆生入佛法門。爲大法將。善能守護一切智城。菩薩如是難可值遇。唯身語意無過失。

者然後乃得見其形像聞其辯才於一切時常現在前善男子我已成就菩薩解脫名爲雲網善財言聖者雲網解脫境界云何爾時大天於善財前示現金聚銀聚琉璃聚玻瓈聚砮磲聚碼碯聚大磖寶聚離垢藏寶聚大光明寶聚普現十方寶聚寶冠聚寶印聚寶瓔珞聚寶璫聚寶釧聚寶鎖聚珠網聚種種摩尼寶聚一切莊嚴具聚如意摩尼聚皆如大山又復示現一切華一切鬘一切香一切燒香一切塗香一切衣服一切幢幡一切音樂一切五欲娛樂之具皆如山積及現無數百千萬億諸童女衆而彼大天告善財言善男子可取此物供養如來修諸福德并施一切攝取衆生令其修學檀波羅蜜能捨難捨善男子如我爲汝示現此物教汝行施爲一切衆生悉亦如是皆令以此善根熏習於三寶所善知識所恭敬供養增長善法發於無上菩提之意善男子若有衆生貪著五欲自放逸者爲其示現不淨境界若有衆生瞋恚憍慢多諍競者爲其示現極可怖形如羅刹等飲血噉肉令其見已驚恐惶懼心意調柔捨離冤

結若有衆生慳沈癡憊爲其示現王賊水火及諸重疾令其見已心生惶怖知有憂苦而自勉策以如是等種種方便令捨一切諸不善行修行善法令除一切波羅蜜障具波羅蜜令超一切障礙險道到無障處善男子我唯知此雲網解脫如諸菩薩摩訶薩猶如帝釋已能摧伏一切煩惱阿修羅軍猶如大水普能消滅一切衆生諸煩惱火猶如猛火普能乾竭一切衆生諸愛欲水猶如大風普能吹倒一切衆生諸見取幢猶如金剛悉能摧破一切衆生諸我見山而我云何能知能說彼功德行善男子此閻浮提摩竭提國菩提場中有主地神其名安住汝詣彼問菩薩云何學菩薩行修菩薩道時善財童子禮大天足繞無數而辭退而去

第九善友大天寄無縛無著解脫迴向謂不爲相縛不爲見著作用自在故解脫善友名大天者現大身故無縛無著智淨自在故名爲天稱理普應故名爲大妙用難測故名爲神墮羅鉢底城者此云有門謂有此微妙法門爲法師故爾時善財重

子由領前教得入菩薩廣大行等十三種法門。漸次至彼城闢大天現廣大身爲衆說法。以九當法師位稱法界說。故現大身說善財作禮。諮問法要。時大天長舒四手取四大海水自洗其面。持諸金華散善財上。以將授法界。故先作此方便也。長舒等者。疏有二義。約事則發心難遇。當淨目而觀。散華而供。約表爲展四無礙解手。取所證勝真如。流相應法門。先當自洗法身後。因利他故。云散華大天告言。善男子。我已成就菩薩解脫名爲雲網。此正授法界善財問雲網解脫境界云。何大天卽於善財前示現金銀等諸珍寶聚。猶如大山。又復示現一切華香妓樂諸童女等。告善財言。汝可取此修諸福德。施諸衆生。等有九行。半經皆法門之業。用所以示現而以施者。意表菩薩以如幻法門。以四攝事教化衆生。故無縛著。令超障礙。到無障處。以表此位說法利生。皆隨所示現也。後謙已云。我唯知此雲網解脫門。如諸菩薩種種妙行。非我能知。乃推勝云。此閻浮提菩提場有主地神。其名安

住汝可往問當爲汝說時善財瞻仰辭退而去

爾時善財童子漸次遊行。趣摩竭提國菩提場內。安住神所。百萬地神同在其中。更相謂言。此來童子卽是佛藏。必當普爲一切衆生作所依處。必當普壞一切衆生無明蔽藏。此人已生法王種中。當以離垢無礙法縉而冠其首。當開智慧大珍寶藏。摧伏一切邪論異道。時安住等百萬地神。放大光明。徧照三千大千世界。普令大地同時震吼。種種寶物處處莊嚴。影潔光流。遞相鑒徹。一切樹葉俱時生長。一切華樹咸共開敷。一切果樹靡不成熟。一切河流遞相灌注。一切池沼悉皆盈滿。雨細香雨徧灑其地。風來吹華。普散其上。無數音樂一時俱奏。天莊嚴具咸出。美音牛王象王師子王等皆生歡喜。踊躍哮吼。猶如大山相擊。出聲百千伏藏。自然涌現時。安住地神告善財言。善來童子。汝於此地曾種善根。或爲汝現。汝欲見不爾時。善財禮地神足。繞無數匝。合掌而立。白言。聖者。唯然欲見。時安住地神以足按地。百千億阿僧祇寶藏自然涌出。告言。善男子。今此寶藏隨逐於汝。是汝

往昔善根果報是汝福力之所攝受。汝應隨意自在受用。善男子。我得菩薩解脫名。不可壞智慧藏。常以此法成就衆生。善男子。我憶自從然燈佛來。常隨菩薩恭敬守護。觀察菩薩所有心行智慧境界。一切誓願諸清淨行。一切三昧廣大神通。大自在力。無能壞法。徧往一切諸佛國土。普受一切諸如來記。轉於一切諸佛法輪。廣說一切修多羅門。大法光明。普皆照耀教化。調伏一切衆生。示現一切諸佛神變。我皆能領受。皆能憶持。善男子。乃往古世。過須彌山微塵數劫。有劫名莊嚴世界。名月幢。佛號妙眼。於彼佛所得此法門。善男子。我於此法門。若入若出。修習增長。常見諸佛。未曾捨離。始從初得。乃至賢劫。於其中間。值遇不可說不可說佛刹微塵數如來應正等覺。悉皆承事恭敬供養。亦見彼佛。詣菩提座。現大神力。亦見彼佛。所有一切功德善根。善男子。我唯知此。不可壞智慧藏。法門如諸菩薩摩訶薩。常隨諸佛。能持一切諸佛所說。入一切佛甚深智慧。念念充徧一切法界。等如來身。生諸佛心。具諸佛法。作諸佛事。而我云何。

能知能說彼功德行。善男子。此閻浮提摩竭提國迦毗羅城。有主夜神名婆珊婆演底。汝詣彼問菩薩云。何學菩薩行。修菩薩道。時善財童子禮地神足。繞無數匝。殷勤瞻仰辭退而去。

第十安住地。神寄入法界。無量迴向。謂等以法界善根迴向法界。故善友名安住地神。耆地爲萬法所依。卽所入法界。安住卽入義。在菩提場者。菩提是本前南有所表。從本之南。今攝末歸本之法界。故不云南矣。又地上證如亦同本。故今迴向終。故攝歸此。此疏義也。統約長途。以前三賢所修普賢衆行。皆依眞如法界建立。今迴向位滿三賢。因終攝前衆行。統歸一心。以爲入地之勝進。以始從法界所流。今終歸法界。以地爲根本法界。故以安住地神寄此迴向也。故下有百萬地神。同在其中者。表地爲萬行之所歸。故更相讚善財者。以善財隨修證入眞如地。故時百萬地神皆放大光明。現種種瑞相。謂證此眞如自然而不思用。故不待問卽爲示現。故安住地神以足按地下。萬阿僧祇寶。

藏自然涌出。正顯真如法界爲大功德法寶藏。故已證在已。故云隨意受用。次乃告言。我得菩薩解脫名。不可壞。智慧藏言。不可壞。然可壞者。無明不可壞者。眞如如來藏。亦名智慧。此正示法界先標名體。用疏云。謂一念之智。冥乎法界。則不可壞。此中則無所不生。故名爲藏。由賢位既滿。總會三賢爲入地之因。故顯善財之福。常隨地神之智。不壞是則昔因不失。能入證矣。次我憶下。別顯業用。次乃往古昔下。顯得法時處。次我於下。總結純熟。次謙已云。我唯知此。不可壞。智慧藏法門而已。如諸菩薩入一切佛甚深智慧等勝行。非我所知。乃推勝云。此閻浮提有主夜神名婆珊婆演底。汝可往問。當爲汝說。時善財童子禮地神足。瞻仰辭退而去。上十迴向竟。下寄十地。

爾時善財童子一心思惟。安住神教。憶持菩薩不可沮壞。智藏解脫修其三昧。學其軌則。觀其遊戲。入其微妙。得其智慧。達其平等。知其無邊。測其甚深。漸次遊行。至於彼城。從東門入。住立未久。便見日沒。心念

隨順諸菩薩教。渴仰欲見彼主夜神。於善知識生如來想。復作是念。由善知識得周徧眼。普能明見十方境界。由善知識得廣大解。普能了達一切所緣。由善知識得三昧眼。普能觀察一切法門。由善知識得智慧眼。普能明照十方刹海。作是念時。見彼夜神於虛空中。處寶樓閣。香蓮華藏。師子之座。身眞金色。目髮紺青。形貌端嚴。見者歡喜。衆寶瓔珞以爲嚴飾。身服朱衣。首戴梵冠。一切星宿炳然在體。於其身上。一一毛孔皆現化度無量無數惡道衆生。令其免離險難之像。是諸衆生或生人中。或生天上。或有趣向二乘菩提。或有修行一切智道。又彼一一諸毛孔中。示現種種教化。方便或爲現身。或爲說法。或爲示現聲聞乘道。或爲示現獨覺乘道。或爲示現諸菩薩行。菩薩勇猛。菩薩三昧。菩薩自在。菩薩住處。菩薩觀察。菩薩師子。嚙申菩薩。解脫遊戲。如是種種成熟衆生。善財童子見聞此已。心大歡喜。以身投地。禮夜神足。繞無數匝。於前合掌而作是言。聖者。我已先發阿耨多羅三藐三菩提心。我心冀望依善知識。獲諸如來功德。